

**Kanoana**

<i>Te Kamauri</i>	1
<i>Kaongora man NSC</i>	2
<i>Kangora mai irouumi.</i>	2
<i>Mataku Tamnei</i>	7
<i>Te Karaki</i>	8
<i>Ana Tangira Te Uea</i>	10
<i>Te Maeu ae Tabu</i>	17

Te Kamauri

Mauri n ana
Tangira te
Uea,

Ti na boti
banara ni
katituaraoa
ao n ne-
boneboa te
Uea ba E
kateima-
toaira iroun
Tamneina
ae e Raoiroi
n reitaki
inanon ana
baintangira
nakoirae
Emmanuera.

Ti bon neboia man katituaraoia naba ibukin
katauara irouna ba ti na kakatonga ana
kimareirei i karawa, ikai i aon te aba, aika a
kakoauaki n ara tibatiba i nanon Emmanuera.

N te bong aio ae te Toa ae te Riki n
Imakurata, ao ti neboa te Uea, are e kaur-
ingira aron kororaoi ana Tangira. Ibukin
kororaoi ana tangira, Ngaia ae E maaka
ao E mimotng ao E rineia ba E na maeka
ibuakora, rinanon Tinara Nei Maria.

E taku aia taeka taan rabakau ni
kaotaa raoi aron makan te Atua ba 'With
God's Grace, nothing is impossible,' 'N ana
Karatia te Atua ao akea te bai ae e aki ko-
naki ni karaoaki.'

E nang ni barabara raoi iai aron
Tinara Nei Maria n Riki n Imakurata. Ngke
e kataua te Atua ba E kan maeka ibuakora

ao E kataua Nei Maria ba e na riki ba Tinan
Natina, N ana Karatia te Atua ao e riki n
Imakurata Tinara Nei Maria. E riki ba tinan
te Atua ao mwengan te Tamnei ae e Raoiroi.
E riki ba Tinara ao kawaira rinanon Natina
ae lesu ae Atuara nakon te kamaiuaki. E riki
ba te tia buokira ni kaokira nakon ao ni ka-
teimatoaira inanon te kororaoi are e maeka
iai n ana Karatia te Atua, man moan rikina
ao n aki totoki,

E tangira te Uea, ae E aki kona ni
manuokini taekara, ba n ara tai ni maeka i
aonteaba ao ti na kona ni katonga ki-
mareirein karawa, ma Ngaia are E ruo ni
maeka i buakora n tainako ao E tiku i bua-
kora n tainako.

Ti nang butimaea lesu te Tei n ana tai ni
bungiaki ao tera ara katauaoi i maina?

Tariu ao maneу, ti bon riai inanon
tain te Avenete ni butia te Atua ana karatia
ba ti na tau (made worthy) ni butimaea lesu
te Tei ao n neboa te Atua ma Tinara Nei
Maria ao Santo Ioteba ao anera i Betereem.
Ti bia katotongia taan kawakin tibu n aroia n
mangori ma n tantani n tauraoi ni butimaea



ao n taromaria te
Merimeri ae E roko
ibuakora ke Em-
manuera.

Bon iai ana
baintangira Nei
Maria ae kan an-
ganira inanon Kiriti-
mati ba te kona n
toba Natina ae te
Merimeri ma ti

teuana te bai are e na kakoaua Nei Maria
iroura imain ae e anganira Natina ba 'ti
kona n tobaa raoi Natina n te

aro ba E na mwengaraoi ao
e na aki kabuanibai.'

N reitaki ma nanon Nei Maria
ao e na bon reke ara tai ni
kabaroa ara tangira nakon te
Merimeri ngkana e a roko ara
tai n tobai!

"Ti bia katotongia taan
kawakin tibu n aroia n
mangori ma n
tantani....."

Kiribati Catholic
Charismatic Renewal
Service

Ibukin am rongorongo, taiaoaka reitaki ma
Uriam Timiti, Filitua Taraora, Beneteta
Raobati ao Kautoa Tonganibeia.

Phone: + 679 3385364
E-mail: timiti_u@usp.ac.fj;
f_taraora@hotmail.com
bene_raobati@yahoo.com.au
kautoat@yahoo.com


**Atia n reke irouum Emmanuera 1 ao 2 ibukin te
ririki aei, 2009? Neweaba ara website aio, ao
ena reke tibangam ma taian boki n tataro ao
rongorongo aika kamimi man kakaongora naba
iai.**

www.kccrs.org.ki



Kaongora man NSC

Kaoti Teingoa, Te tia babaire KCCRS



Bon banan te NSC ni kamauri ngkami tarira ao manera n te Kiritimati aio. Kam na bane ni mauri n Ana Tangira Te Uea. Tia bon katituaraao Te Uea ma ni karaba ibukin ana kakawakin nakoira ni bane.

Tia tia ni waki ngaira ake ti rabatana te NSC n te tai aio mai mwin te Benetekota ni karokoa te tai aio. N ana waki te NSC n te tai aio ao e katala riki ni kaungai ao ni kamarurungi itera aikai inanon ara botaki ni Charismatic;

1. Matennanoakin riki Ana Karea Te Tamnei ae Raoiroi
2. Makurian taian ministries n te Charismatic

Buokaia tarira ma manera iaonnaba.

Ibukin matenanoakin riki ana karea Te Tamnei ae Raoiroi ni ikotaki ma makurian taian ministries aikai ao te NSC e a bon katikui inanon baia Parish aika Betio, Teaoraereke ao Bikenibe. Iai te anga reirei iaon item No1. ieta ae e a tia ni wakinaki ti iaon Teaoraereke Parish, Tabiteuea Meang Parish ao ai Tabiteuea Maiaki Parish.

N ara bowi n te Kaonobong ae 26/09/09 ao e tuangira ara Chaplin ae Fr Michael ba a na kawaraki abamakoro aika Butaritari ao Kuria ba a tia n roko aia bubutti. Ibukin aki toamaun ara taibora n te tai aei are e riki imwin kerikakin ara kauoman n Tia Babaire ao e tuangira te Tama ba ai toamaun ara Taibora ngkana e reke onean mwin te kauoman Tia Babaire ao e a baireaki te mananga aio. Imwin reken onean mwin te kauoman Tia Babaire mai Bikenibe Parish ao tia tewea ara bowi ae katawe n te kaabong ae 8/10/09 ao n te bowi ane are e a baireaki naba iai ba Parish ra aika a na mananga. Imwin te babaire ao Betio e na nako Kuria ao Bikenibe nako Butaritari, ao Teaoraereke e a karaoa te abamakoro ane moan roko imwin te babai-re aei.

E a tia n otinako Emmanuera 2 ibukin July-September ao e a tiku man tuai kaoti-

nakoaki iaan te itera are akea te mwane n te tai aio. E a tia te NSC ni kanakoa banana nakoia Parish nako iaon Tarawa Teinainano iraua te tai ma ti \$20 te mwane ae mai Betio ibukin 2008 ao 2009. E rotaki te NSC n te itera ae akean te mwane ao e mamara ana waki iai ao ni buti toki. Ti a manga moan bunra riki te bubuti nakoimi Parish nako. N te tai aio ao tia rangi ni butimai ibuobuoki ma anganano mai iroumi tarira ao manera aika kam ongo te kanganga aio ao kam rabba.

Ribooti man Parish nako bon ti tenua (3) ake a tia n roko ba Marakei, Aranuka ao ai Teaoraereke, ngaia are ti bon tiku naba n tatatingai ami ribooti ngkami Parish ake kam tuai karokoi. Iaon akean te m'anee ao e aki nakoraoi te reitaki ma aonnaba ma tao ai reken te m'anee ao e a kona ni marurung te itera aio ao ai arona naba ma waki ni kabane.

Kaongora mai irouumi

Ana Ribooti Teaoraereke Parish

Nei Meeta Eruuta, Kauoman Tiibi Riita, Teaoraereke

I kukurei n taekinna ba i buakon te mamara ao I karaba Te Uea n Ana buoka iron te Tamnei ae Raoiroi ba Ea tia n anganira te kona ni kekejaki ni karaoi tibangara inanon ara botaki ni Charismatic n ara Parish ae Teaoraereke.



Aikai ngkanne kanoan ara waki n ara Parish ake ti wawakin inanon ara Parish aio;

1. Te kawai ni kaibangaki
2. Te Tantani n te Eukari
3. Te Karea ni Benetenia (Aki mamamatam)
4. Makurian taian ministries ake bon kanoan te Charismatic
5. Matennanoan riki Ana Karea Te Tamnei ae Raoiroi.

Te Kawai ni Kaibangaki

Ti kakaraoa te kawai ni kaibangaki ni katoa kaabong koraki.

Te Tantani imatan te Eukari

Ti tantani ni katoa Kanimabong koraki n tiku imatan te umantabu ngkana e raoi ao ngkana e karau ao ti tiku n St. Ioteba maneaba ao n ririanna ara tei ni karokoa te ngaina ao ai baranakora imwin te Tutia ni ingabongin te



Kaonobong.

Te Karemo ni Benetenia (Aki mamatam)

Ti kakaraoa te aki mamatam n iranaki ma te aki moko ni katoa Kanimabong koraki, ao ti aki ti te tai anne ma ti kona ni wakinna naba n taai ake a kainnanoaki iai taitan ibuobuoki ao makuri ake ti na wakin.

Makurian taian ministries

i. Te tataro ma aoraki bon te bai ae kuri katoabong kainanoakina ao n reitaki naba ma aoraki ake akea rabataia ikai ba a mena n taabo aika raroa nako (Katokabai n Tamnei) ao ai bon itera ni kainano ake a tangiria iaan aia auti. E teimatoa te waki aei.

ii. E reke naba tibangara irarikia kain Bikenibeu Parish ngke e kairira tarira ae Taarome mai Banraeaba nakon natina are e rin n te o ni baba (mental ward) are ti reitaki iai ma tarira ao manera aika kain Bikenibeu Parish are bon tibangaia ba e mena iaan aia Parish.

Te Taetae n Burabeti

E rikirake maeuakinana ao a maiti ake a tia ni kaotinakoa ana rongorongo Te Uea n oin aia taeka.

Kawaran te Karabuti n tataro ma bure



N te Kaonobong ae 28/11/09 ao aio te tai are e a tiba manga reke ara tai ni kawaria bure i Bairiki, ao mai ikai are tia katuka ara rongorongo irouia ba ti na manga kaboua te reitaki ma ngaia inanon bongi rake aikai. I a angan ara tia babarie n te NSC are bon raora naba ba e na wakina te nebobebo ma bure. N tain te nebobebo ao aio ana taeka Te Uea. "Ana kabanea n Taeka Ieremia nakon leteki (Ieremia 38: 14-28)". Imwin tibaakin ana taeka Te Uea ao ai te katokabai iaoia bure n reitaki ma te warden are e tei n te tai anne ae Nenetaake.

Ni baran te nebobebo ao e a nako n te tibatiba ao aikai ngkanne taian tibanga ake a tibaaki;

i. Nei Meera Kaitaake kain te Kurubu n tataro; E tiba tibangana are e noria n tain te ianena are n te katokabai ba e nora te ran

ae ti man
taian
taebu
(water
tap) ni
katobibia
te mane-
aba ao e a
ranga ni
kaona
nanon te maneaba.



ii. Temanna te bure e tibatiba ba ngke a kaongoaki ba a roko kain te Charismatic ao e taku inanona tiaki kain te Charismatic ngai ba kain te Taanga ma e mimi ba e kairaki nanona ba e na ira te nebonebo ao e a bon taonna te tang ae korakora.

iii. Warden Nenetaake e tibaia Nenetaake ba moan te kamimi ami botaki n tataro aei ba akea nanou ae Nna iria ma te kamimi ba ngke I roko irarikin te maneaba ao I ongo manewen kunami ao e a bon taonai naba te bai teuana ba ai te tang ae korakora ngke e roko irou te ang arei ao I tei naba i tinaniku ma titebo irou ba I bainrang ngaia are I tara tanrake ao I a manga tara maeao ao e roko naba te nano irou are kangai Nna rin ba tao bon ana wewete Te Uea, ngaia are I a rinnako n tekateka ao ngke e toki te anene ao ea moanna n toki te ang arei.

Ngke e moannaki te tataro ao e a nako te reitaki ma Te Tamnei ae Raioroi ao e a manga roko naba te ang arei ma are e a anganai te kan tatakarua n tang ma I a bon kataia n taotaonna. Ao ngke a baa te ang arei ao I mimi ba e a taona mwina nte kimarerei ae e anganai te rau ma te kukurei ao ngke I tara raou ae i angamaingiu ao i angataiu ao bon ti tebo naba aroia ba ai te katumaua naba te tang. Ngke I karaua ni iangoa te ang arei ao I bon ataia ba bon te Tamnei ae Raioroi are E a niniai ao e a reke naba au iango ba Nna rin n te botaki aei. E koro nanon ana iango Nenetaake ba n tain te Kurubu i Natari n te Katenibong 2/12/09 n ana auti tarira ae Nei Teakoaua ao bon te kauoman n aomata ngaia n roko. E aki toki nanona ao e a manga tiba naba te baere ringana ioun te Tamnei ae Raioroi ao e tiku ma te kukurei ao kantanangan te botaki. Inanon tain te nebobebo riki n tibakin ana taeka Te Uea ao e a manga roko naba te aeka n namakin arei ao e a bon irianako n tang ao e kanakoa ana tekennano are e ringaki iai man te kibu n taeka ae kangai "Kam na neboai man otintaa ni karokoa bungintaai". Inanon ana tibatiba ao e taonna te tang ao n tokina e rotaki natina



"..ngke I tara raou ae i
angamaingiu ao i
angataiu ao bon ti tebo
naba aroia ba ai te
katumaua naba te
tang...."



*"Ao ikai are e
anganira naba te koaua
ni koaua ba e maeu ao e
makuri te Uea inanon
ana karea..."*

ao e a kaai n tang ma tamana. N tokin ana tibatiba ao e reitia ni kangai bon am wewete aio Te Uea nakoiu ao Nna irianako ba tao iai tibangau iroum. Imain nakona ao e kauringira ba ti kanga nakon te Kaonobong kam na manga?, I dayoff n te bong anne ma l a iri n tataro irouia bure. E raba Te Uea n ana makuri aika a kamimi nakon Nenetaake.

Matennanoan Riki ana Karea Te Tamnei ae Raoiroi

Imwin te anga reirei iaon ana karea Te Tamnei ae Raoiroi are e wakinna Te Tia Babaire n te NSC imain te mananga nako Tabiteuea Maiaki ao n te okirikaki ao e rikirake

irouia kain ara Parish matennanoan ana karea Te Tamnei ae Raoiroi ao aikai uana ake a reke iroura: e anganira te noraba (vision) n tain te tataro ma te aoraki ao e anganira te kona n ata boton te aoraki ke boton te kanganga (te ataibai), te matairiki ao ai te kona ni kaotinakoa ana rongorongo Te Uea n oin ara taeka ao a maiti riki. E anganira naba te koaua ae E bon maeu lesu ni koaua inanon neboana ao e bon kona naba ni karaoi baike ti butia n ara tataro. N tain te tataro i lerutarem ma te aoraki ao ti kaoa lesu n ara anene are e kangai "E a nakomai lesu ae ara Tia Kamaiu" ao tarira ae Nei Tebarae e a bon nora lesu ni waki ni kawara te botaki n tataro ao n rin n nako nuka. Te kauoua n tain naba te tataro ma te aoraki i Natari ao e noria naba tarira ae Nei Tekanebu ngke ti kaoa lesu n ara anene naba arei, ao e noria n ruo mai karawa n ruaki ni bakarereka te Baibara are e mena i nuka. Ao ikai are e anganira naba te koaua ni koaua ba e maeu ao e makuri te Uea inanon ana karea, ao e karikira naba ba ana bai ni makuri (tools) n te tai teuana ke n tai aika maiti n uota ana kamaeu ma ana nanoanga nakoia aomata inanon aorakin tamneia, aia iango ma nanoia ao ai aorakin rabataia.

Ti karaba Te Uea n ana karea ake E a tia n anganira aikai ao ti na butia ba E bia kateimatoai ao n anganira naba te kona ni kawakina raoi ao ni kamanena raoi ibukin neboakina ma kamomoakina ba te Atua Ngaia ae Maaka ao E maeu ma ni Uea n aki toki.
Amen



Ribotin man Betio Parish

Riwata Obetaia. Tiibi Riita, Betio Parish

Riboti man kurubu.

A bon wawaaki kurubu n rereitaki n tataro i aon Betio n aia tai are te Katenibong n te wiiki koraki n aron are e bon taabanggaki. Maitin kurubu bon nimaua n aron are e a tia naba n ribootinaki mai imaina n Emanueara II. Iai teuana kurubun Temakin, ao aua mai Takoronga. N taian ribooti ake a tia n rereke n te bowi n riita are e boboaki n te Kaabong koraki imuini te tutia i Takoronga ao e noraki ba iai te marurung ae e tabe ni kekerake n taiani kurubu.

I Takoronga ao a tia kurubu aika uoua aika Tiotaam Te Eti (a riita iai Nei Riano ao Nei Tebewea) ao Santa Faustina (a riita Kautoa ao Nei Rokoraoi) n rereitaki ni boboa aia tataro n nebobebo n ana auti aia riita ae Kautoa ao tabeua riki menga ao maneaba aika Tiotaam Te Eti ao Santo Mikaere.

N aia wawaki aio ao e noraki ba iai te marurung ae e reke ao man iai naba ake a manga boou ma n rin n te botaki n tataro ni makoro aika uoua aikai. Aio are e reke man aia iango ni bonnano riita ni kurubu aikai, ao ti a kakaitaua iai te UEA n rikiraken te marurung ao ibukia tarira ma manera aika a boou, ake a manga reita te botaki ni Charismatic.

N rokoia n te maneaba ae Tiotaam Te Eti ao bon raoia te Katekiti iai ae Antonio ma buuna. A bon rangi n maiti naba kain te makoro n roko n reita te nebobebo. E rangi n rebetaua neboakin te Uea n te tai anne. N ana tibatiba te riita ae Nei Riano ma buun te Katekiti aio, ao e taekinna te aine aio, bwa e bon uree kunna ma n roko iouna te namakin ae e aki kona ni kababarara, i nanon tain te nebobebo n ianena. A na manga booa aia reitaki i nanon wiiki aikai, kurubu aika uoua aikai, n te Maneaba ae Teitoi ni Marawa.

Iai te kantninga n aron are e ribotinna aia riita temanna ae Kautoa ba a na kona n te tai anne n reitaki iai ma te katekiti ae Maio. E a tia te katekiti n rineaki ba te tia



kawakina te Charismatic Renewal ae e banin i aon Betio. A iangoia ba a na butiua ao ni kaungaa ba e na rereita aia botaki n tatataro, ao ni kaungaia naba kain ana makoro nakon te botaki. Maitiia kain kurubu aikai e nakon uangaun tabun ma n tabe ne kekerake. N te Katenibong ae e nako ao a bon kawaraki irouia tiibi riita.

Kurubu aika Santo Rabaere (a riita



iai Nei Tearaa ao Nei Teera), a bon marurung naba ma ma n wawaaki ao iai kaina aika a boou

tabeman. Iai naba kaaina mai i maina ake a manga tiba kaoti n roko n rereitiia. Maitiia kaina, e kani ngaun tabun ao a kona riki n raka n taai tabetai ngkana a kawarii menga tabeua n nebobebo iai. Aran te kurubu aio bon Emmanuera ngkoa ao a manga tangiria ni kabouua araia aio ni maeuakina riki kamimiin ana Tangira te UEA ni menana i buakora n taai nako. E rangin marurung aia 15 ni miniti, ao iai naba ibuakoia ake iai te mamara teutana i aon aia 15 ni miniti.

Te kurubu ae Te Rooti ae Kamimii (a riita iai Nei Marao ao Nei Mangarita), e bon marurung naba, ao iai te kekeiaki irouia kaina, e ngae ngke a tuai manga rangi n maiti kaina n roroko ake boni kaina mai-maina. A bon buti naba i aan auti, ao e teimatoa aia rereitaki aio i nanon wiiki aika a nako n uaa te tai aio. A tuai rangi n tutuoia aia 15 ni miniti ma e kakoauaki ae bon iai teutana te mamara ma a bon teimatoa ni kekeiaki ni baeia te tataro aio.

Te kurubu mai Temakin a manga kukurei ni butimaea aia riita temanna ae boou ae Nei Reei are a tia n rineia bwa e na kauoman n riita, ngkai akea aia kauoman n riita. E a manga noraki te maiu n te kurubu aio, ni maitin kaina n roroko n nebobebo. A boni boboa aia nebobebo n te Katenibong koraki n te Kaotitaeka Umantabu i Temakin i muiin te tutia n te bwakantaai koraki. Aio te kurubu are a botaki naba iai kain Temakin ni kabane moa n te tai aio. Aio bon te kurubu teuana are bon kaina ngkoa angina tarira ao manera aika a kara ake a angia a boni bane ngkai n tia ni motirawa man te maiu aio aika Nei Teuea Tiare, Nei Ellen Edward, Nei Caroline Edward, ao ai Nei

Ruiiti. Nikiraia kaara aikai aika a bon teimatoa naba n roroko n te kurubu aio bon Nei Teretia Mamara, ao ai Nei Naomii Buratio. N te ribooti are e karekeaki mairovia aia riita ao te kauoman n tiibi riita, ao a kaoitia ba a nang moana kawarakin menga n tataro iai n te Katenibong. Aia riita iai bon Nei Reei ao Utimawa.

Kawarakia buure ao aoraki.

Iai te marurung ni kakawarakiia buure ao teutana te kerikaaki ni kawarakiia aoraki. Taini kawarakiia buure bon te Kaonobong koraki. E noraki rikiraken maitiia taani kakawariai buure. Te tiim aio, e bon kakaraoa naba te tatato ma aoraki n te onnaoraki i Temanoku ni katoa Moanibong i muin te tutia are e boboo i Temakin. Te tiim aio, bon iai aia riita are e mwiokoaki ba te tia kakaira te tatato ma buure ao aoraki. Angiia kaina, a bon teimatoa kakawarakiia buure irouia, ma iai noran te kanganga irouia ni kakawarakiia aoraki i Temanoku ao e noraki ba e riai riki ni manga kamarurungaki te tabe ae e kakawaki aio

Taai n bowi ao Tataro

E teimatoa aia bobowi riita ni katoa Kaabong koraki n te wiiki are tiaki iai te bakabai i muin te tutia are n te aoa onoua n te tairiki i Takoronga. A aki totoki naba ni boboa aia tataro n nebobebo i muin te tutia are n te ingabong koraki n kabubutia i Takoronga ao i Temakin. Ni katoa tutia koraki ao a bon katanoata ni kaoia aomata ake a kan rereitia n aia nebobebo. E noraki ba iai aika a raraka ma ni bobou mataia ni kakaoti n te waaki aio.

Katauraoi ibukin te nako Kuria

E tabe ni kakautaroi te botaki ni Charismatic Renewal mai Betio ibukin tibangania are e na karaoa te nako Kuria n aron baireakina mairoun te Tama (Fr Michael) ma te NSC. A tabe ni kaikoikoa aia tainti teutana ibukin boon kantokaia aia koraki. A tia n rineaki itiman riita ba a na kaina te tiim ni mananga moa ngkai n nako Kuria. A bon biribiri kurubu aika nimaua aikai ni kaka \$20 i aon te kurubu i nanon te bakabai ae uoua bwa kantokaia.. E bon kaukaki te mwananga naba nakoia nake a kan iri man kurubu ake nimaua. A na bon bubutia naba aia parish ibukin ana ibuobuoki nakon te kantoka n aron are a bon tataneiai iai mai maina are e bon ibuobuoki iai te parish.

E korakora kariariakin te rereua ni banin irouia naba kain te botaki mai Betio



"A iangoia ba a na butiua ao ni kaungaa ba e na rereita aia botaki n tatataro, ao ni kaungaia naba kain ana makoro nakon te botaki."



*“12 aika a
kainaomataki te
Tamnei ae Raoiroi n
ana boraki St Padre
Pio I Suva”*

ngkai e tuai ma ni boboaki, ao a tiku ma te kakantaninga ibukin katiakin taiani babaire i aon aio man te NSC ao te Komete N Reitaki ae e banin i aon Tarawa.

(A kona n reke riki rongorongan (updates) te botaki ni Charismatic Renewal iaon Betio irouia riita n taian itoman i aon namba aikai: (686) 97328 ke email otebetaio@gmail.com ke (686) 96187 email kautoat@yahoo.com.

Ribooti mai Suva, Fiji

Tabati (6-12-2009)

Aritita Katang Tekaieti. St Padre Pio, Fiji.

Kainaomatan te Tamnei ae Raoiroi ao kaukan nanoia ni butimaia, bon moan baan te kakukurei irouia ara koraki aika tengaun ma uoman (12) maitia n St Padre Pio i Biiti.

Ara kakaitau ae moan te bati nakon tamara te tama Joseph Kanimea ibukin ana kariaia ngkai e butimaea ara bubuti ike e a reke iai ara tabo ni kainaomata.

E moanaki man te kabane (camp) n te Kaonobong ni karokoa te Tabati n te MSC House i Wailoku. Iriana te aki mamamatam ao te maiu n tataro inanon boong akanne ibukin ara katauraoi.

Kanoan Te Kaonobong:

E kaukaki n te tataro n te bakan-taa n te aoa 3:00 ike e a reitaki naba ma te katairiki n te bwerena ma te ran inanon te bakantaai anne. Imwin anne ao e a babaireaki te tabo ni matu n autin nako te MSC are a tauraoi ibukira. Ara karab-warabwa nakoia te tari lbeatabu ma ana koraki n ataei ni mane ibukin aia ibuobuoki nakoia ara koraki n karokoia n aia tabo ni matu ike a bane iai ni butimaeaki raoi man mwengaraoi.

Ngke a tia ni mwengaraoi te koraki n aia tabo nako ao e a manga waaki te nebonebo ike e a moanaki iai ma te korona nakon Tinara Nei Maria ibukin ara tama are e wene n aoraki n te tai anne ao imwina ai te nebonebo naba. E bane kanoan te bong anne ao e a waaki naba te nako ni iangoaki te motirawa.

Kanoan te Tabati:

N tamaroan te Tabati anne ao e a kaukaki kanoan te bong anne ma te korona nakon Tinara Nei Maria n te aoa 5:00am. Imwina ao ai bon te kaingabong naba ao are ai te katauraoi naba nakon te tutia n te aoa 9:00 am ngkai e a reke te marurung

teutana iroun tamara, **E RABWA TE UEA**.

Ni bwaran te tutia ao ai te motirawa tabeua te miniti ma te ingainga n nano imain te kainaomata irouia ara koraki bon moan te korakora n te tai anne.

Ngkanne e a waaki are imwina are ai bon te kainaomta. E korakora angin te kukurei ao te kaonrakeaki n te Tamnei ae Raoiroi n tain waakin te kainaomata aei. E rabwa te Uea ba e bati namakinana riki irouia ara koraki ake a angan Te Uea nanoia ba E na inaomata iai, ao ai bon kain te botaki ni kabane.

E toki te kainaomata imwin 2:00 pm ao e nako te aba ni maneabaia kain te MSC ike e a botaki iai te koraki ni kukurei n te baka n amarake ao ni mooi ibukin ara kakaitau nakon Te Uea ibukin tamaroan ao na-koraoi te bong anne. Ara irua bon tarira ma manera ake kain te kainaomata ake tengau ma uoman, kain Biiti uoman are a reke iria n te tai anne ao ai Nei Beia Uering (te leader temanna mai Tarawa). E a bwaranako te botaki ao te kabane ni bwaran te botaki n te bong anne.

Ana tabo n rawebana te charismatic ae boou

Bon iai teuana te kanoa ni mii are e a koro bukina ngkai ao aio are bon reken baai aika a kona ni kabonganaki ibukin te rawerawe ao karaoan kuna ibukin neboan te Uea ao kabutan te rongorongo ae raoiroi. Ti bon reitaki ma ngkami tarira ao manera charismatic ni kabane ni karaba te Uea n ana akoi ao ana baintangira aio ba ti ataia ae bon aio reitan ara waaki ni kakorakora ara waaki n ara charismatic ao ni buoka naba aron karikirakean neboan te Uea ioura ngaira Katorika aika i Kiribati n ara tabo aika a kakaokoro. Bon aio naba ana baintangira nakoira Nei Maria inanon ana toa aio are Rikina n Imakurata.

Aika a ibuobuoki moa ngkai iaon kammakuran baii aikai bon lan namakin ao Katang Samuelu. E na bon kaukaki kamma-kuran bai n rawerawe aikai n tairikin te Kauabong 8 Ritemba are bon te Toa are te Riki n Imakurata. E a bon kabonganaki ngkai aobitin St Padre are i Nabua ba te te tabo n rawerawe.

Ti a bon reiti banara ngaira kain St Padre n anga tataro ao ara katekeraoi ma ara tangira nakoimi ni kabane inanon te Kiritmati ao te ririki ae boou. E bia reke ioura ma ngkami ni kabane te kaiokaki ma te Atua ao ai tarira ma manera nako ba ti aonga ni kona ni katonga te Kimareirei ao te Raoi are E kan anganira te Atua inanon te Kiritmati aio.

Mataku Tamnei



N tain ana katabu
Fr. Saimon Kokoria

E bo te mooi imwin te ne-bonebo ni maneaban
Teitoi ni Marawa

Kawarakia bure i Tabonika-buae, Bariki. Irouia kaain Teaoraereke Parish

ngkanne ana buoka te Uea ioun te Tamnei ae Raioiroi ba ti na kona raoi n ngo te taeka ao n ataa nanona. Ngkana e a tia raoi n roko ke n reke ioura te taeka ba ti a tia n ongo ao n ota iai ao ngkanne te bai ae kakawaki ba ti na karoa nanona. Aio ngkanne bon banin te ongotaeka ioura- bon karoan ke mmakurian nanon te taeka.

Ti noria ngkanne ba inanon te ongotaeka ao ti riki n ti teuana ma te aomata are e anganiira te taeka. Uringa ba te taeka bon ana kawai te Uea ni kawarira ke ni kaitobo ma Ngaia. Are nanona ba te ongotaeka bon te bai ae na kairira ke e na katiteuanaira te Uea. Ngkana iai te bai ke te taeka ae ti tuangaki ae e na aki kairira nakon te Uea ao ngkanne ti riai n aki butimaia ke ni karoa nanon te taeka anne.

Aikai rongorongo tabeua aika a kona n anganira ba tera kakawakin te ongotaeka ao tera are ti kona ni karekei maeuakinnna inanon maeura.

1. Ara Tia Kamaeu

E ongotaeka lesu ioun Tamana ni ua te mate ao e kakororaoa aron ana kamaiu Tamana ibukin aonnaba ae banin.

2. Padre Pio

E babaina te ongotaeka Padre Pio inanon maeuna ao e aan taeka man ongotaeka ioun ana mataniwi n te Parish. Taian birimane ma tibanga n te makuri are e baireaki man te Parish, Padre Pio bon ngaia ae kokoro iouna tibanga aikai n te kawa are e tama iai.

N te taina ao e tewea ana bowi te Ebikobo are e tararua aia Parish ao a bane n roko Tama ni kabane. E taekinna te mataniwi nakoia ana Tama aron te kanganga ibukin kabutan ana waki te aro ba a tiku itera ake a riai ni wakinaki ibukin iremwen taian baka biri mai iroumi. I karaba Padre Pio ba ti ngaia ae are ea tia n roko ana biri ana kawa ao n tia naba tibangaia n te makuri. Aio anuan Padre Pio ai bon te bobonota naba ao ni kakoroi aron tibangana, ao n reitaki naba ma bai ake e tuannga ana mataniwi. E anga ana maroro Padre Pio nakoia raona n Tama ni kangai “Te bai ae moan te kakawaki ioura ngaira aika taan kairaki, te ongotaeka iouria ara mataniwi, e ngae ngkana e bure ke eti ma ti riai n ongotaeka ba bon anne baera ni koaua.

Imwin anne ao e reitia Padre Pio ni kangai “Ngkana e tuangai au mataniwi aei ba Nna ewenako man te winto aei ao I a ewenako naba”



Taeka n Reirei

Te Ongotaeka

Kaoti Teingoa. NSC, Teaoraekē



N te tai aei ao ti na kaatua riki ara iango iaon te bai ae te ongotaeka are bon ngaia kaotan ara karinerine ma ara tangira nakon Te Uea. Te ongotaeka boni ngaia te moan karea mairoun te Atua ae moan te kakawaki inanon maeura ni Kiritian ao n riki ba taan tia irira lesu. Boni ngaia nabate karea aio are ti kona n noria inanon maeuia aomata aika tabu. E a bon taekinaki naba ba e bebe te riki te tauraoi ni butimaea te tiringaki nakon te maiu ni maritire nakon maeukanan te ongotaeka.

Tera itera aika kakawaki inanon te ongotaeka? E na riai n iai te karinerine, te nanorinano ao te ann taeka ae e rianaki ma te tangira. E na riai naba n iai ioura te nano ae uki ao ae e tauraoi ni butimaea te taeka. Ti na bon riai naba n tauraoi n anga arora inanon bain temanna are e mataniwi ke e muikoaki n te kairiri. Ti boni kainanoa

“Ngkana e tuangai au mataniwi aei ba Nna ewenako man te winto aei ao I a ewenako naba”



“Ko raba Te Uea ba ngke iaki ongotaeka ao eaki reke irou te Karea n Ataibai”

3. Mother Teretia



N te taina ngke e tabe n tataro Teretia ao e kaoti naba nakoina Te Uea ae Iesu ao e tuangnga Te Uea, ba e roko ana mataniwi ao e tuangnga ba tera ae e karoia ao ngaia e tuangnga ba e karoia te baere e tuanga Te Uea. E un ana mataniwi ao e tuangnga ba e na katukua ao e na karoia are e tuangnga. Ngke e manga tataro Teretia ao e a kaoti Te Uea nakoina, ao e a taku, Te Uea I a babanga arou ba ko tuangai ba Nna karoa aei ao e un au mataniwi ao e tuangai ba Nna aki karoia ma Nna karoia are e tuangai. E kaeka Te Uea nakoina, ko na karoia are e tuangko am mataniwi ba e aonga ni wae-koia n iranaki nanou.

4. Fr Emiliano Tardiff

N te taina ao e roko ana kakao te ICCRS mai Roma nako Canada ba a tangiraki Leaders mani botaki ni Charismatic nako iaon aaba ake a kona n reke rokoia. N te mananga aio ao ea rineaki Tardiff. Kanga ea uakaan tain te mananga ao ea tuangaki naba Tardiff iroun ana mataniwi ba ena anga te mananga nakon temanna. E ongotaeka Tardiff iroun ana mataniwi ngaia are ea rineaki onean mina.

N te bong are e na riai ni kiba iai Tardiff n te wanikiba nako Roma, e toka iaon te man ae te aati ba ena kaea te kawa are e uakan ba ena kaira te rereua iai. N tain te neboneyao ao ea reke iroun Tardiff te karea ae te ataibai.




N reken te karea aio iroun Tardiff ao e karaba Te Uea, ba ngke I aki ongotaeka iroun au mataniwi ao ena bon aki reke tibangau n te karea ae moan ban te tamroa aei.

Aikai rongorongoia ara taan kairiri inanon ara Ekaretia ni moa mai iroun Ara tia Kamaeu are boni Ngaia atun te rabata ae te Ekaretia Katorika, ma uake ea tia ni kabiria ba taan wakina te mwioko are ea tia n anganira ae St. Padre Pio ao Fr Emiliano Tardiff, ao n reitaki naba ma te tina ae Mother Teretia. Inanon rongorongoia ao e anganira baaia aika aua (4) aika a kakaokoro ae a kona n reke man maeuakinan te aan taeka ma te ongotaeka.

Te Karaki

Rinanon Ana Taratara Iesu. (Aio te rairai man te boki ae e atunaki n “Through the Eyes of Jesus”)

Fulitua Taraora. St Teretia n Iesu Tetei, New Zealand



Ana rongorongo temanna te mwane ae C Alan Ames ae kain Aotiteria are e kakaoti nakoina Iesu man 1994, Iesu e bon kakaotii nakon Alan, aron maiuna i aon te aba n ana tai ni maiu ma ana reirei.

E a tia n reke te kariaia mai iroun Alan Ames ba e na rairaki ana boki aio nakon te taetae n Kiribati ao ti na waki n kakaongora i nanon Emmanuera ba buokan kananoan ara reitaki ma Iesu n arona n aomata ao n Atua, i buakora ngkoa ao i buakora ngkai ao n tainako..

Iesu 2-6-96

Ngke ti tabe n rianna i aon te kawai nakon te kaawa are i maira, ao au reirei, a tabe ni maroroakini bai ake a tiba tia n riki n te kawa are ti kitanna. E tabe Betero n tatakaruea neboau ma n taku “N te koaua ni koaua ao ara Tia Reirei bon te Metia. Tarai taian kakai ake e karoai. Taraia aomata ake a bane ni kamaiuaki. Nora naba te tangira are E tibaia Iesu. Ni bon te koaua ao bon ngaia te Uea.”

Iakobo ao Ioane a bon kakaouaa naba ao a onrake n te kimareirei n te aro are a mamaie man anenea, “E a roko te Uea, E a roko te Uea.” E korakora te maroro i marenaia nake tabeman ao a bane n neboneyao te Atua ma n tataekina ana Tangira.

Ngke ti a kaniia te kawa ao Iakobo e biri rimoa ao e titiraki, “Au Tia Reirei, a na iai taian kakai aika a na riki n te bong aio?”

I taraiia, ao I noria n arona ae e a tiba kairake, e onrake n te tangira ma te nano ae e itiaki ao n onimakinai. Tera ngke aomata ni kabane aron nanona!

I taku nakon Iakobo, “A riki taian kakai n tabo ake e korakora iai te onimaki. A riki kakai ni kamatoaa te onimaki, ni kaokia aomata nakon te Atua ao ibukin kamaiuan tamneia aomata. Ngkana arona ba e na kainnanoaki te kakai iai ao e na riki.”

E tarai lakobo ao e wingare, n onrake n te kariaria ba tera are e na manga riki.

"Te Uea" I ongo te bana ae e weteai, "ti na tiku ia nakon te tairiki ao ti na kanga ni kaboa kanara? Ba n te tai aio ao ti tabeua nikiran ara tianti...e aki tau ni kamarakeira..tao ti na bubuti nakoia aomata ba a na kaboko ngkana ko kamaiuia."

I kaekaa luta , " Tera are I anga, I anga ibukin neboan te Atua, I anga n aran Tamau ao I anga n akea boona."

"Ti na kanga ngkanne ni karekeka kanara? Tuangai." e manga kaeka naba luta.

E kawa luta ba e aki ota. E iango, tiaki mai i nanona ma e iango n oin ana wanawana, ao n tainako, ana iango e reitaki ma ana buua ni mane.

"Onimakinai luta. N na karekei bai ni kabane aika ti kainnanoi. Tamau are i karawa, E na anganira bai ni kabane aika ti kainnanoi ba e aonga ni kakoroaki bukin are Nanona ni kabane. I kamarakeia nimaua tengenao ko aki kokoaua ae I kona ni karekei naba kanara?"

E aki rauaki luta ao e bobonako ma te aki rau n nano ao te bangurengure ni kaota aki kukureina nakoia nake tabeman.

N te tai naba anne ao ti a ongo naba te takarua "E a roko. Aio. Bon te Burabeti. Bon Iesu te I-Natareta. Uotia mai ami aoraki, uotia mai. E a roko. E na kamaiuia."

E karongoa te kaawa ao a biraitua aomata ni katoai auti ni kaongoongo nakoia kain rarikia ba I a roko ikekei.

N te tai ae e uarereke ao e a roko te koraki ae e maiti ao a ineneaki ni kataia n roko i rarikiu.


I teirake i aon te atibu ae e bubura ao I titirakinia ni kabane ao n reirei n aron aio," Te Tama are i Karawa, e kanakomaiai ba N na kamaoi ikoakin nanomi, ni kamaiui tamneimi ao ni kaota te koaua mairoun lawe. Te Tama, n ana nanoanga ae akea tokina, E anganiningkami Ana Tangira ao kabaraan ami bure, E anganiningkami te raoi ae akea tokina, te kimareirei ae akea tokina ao te tangira ae akea tokina. Taraia natimi ao noria ba maitira aron ami tangira nakoia ao maitira aron nanomi n iangoia ba a na reke irouia ae te kabanea n tamaroa i nanon maiuia. Ngkai a tabe n ikawairake; kam kairiia, kam angania te reirei ao kam buokia ba a na rikirake ba natin te Atua ni koaua n aron are a bon riai n riki iai.

Te Tama are i Karawa, bon Tamami ao E taratarai ngkami mai karawa, ma ti oin Ana kantaninga ae te kan kairira kawai, n ibuobuoki ao n kaetii ngkami ba aonga n reke iroumi kaniwangan karawa.

Tara te aomata ae e karao kariki. E baana ana burawa ao e botia ma renganana aika a baireaki raoi ao e turuturungna ni katuraaoia nakon te kamaaki.

Man aabuen te ai ao te kariki, e tabe n riki nakon arona are e kantaningaki iai..

Natin te Atua ai bon aroia naba.



Te Tama, e anganiko bai ni kabane ake a na buokiko ni karikirakeko nakon tokin korakoran are ko bon riai n rikirake nako iai. Ao i muina, e anganiko Ain Ana Tangira, ni kaabueeko, ni kauraa ain tamneim, bwa ko aonga ni riki nakon te kabanea n tamaroa ao ni kariki uaa, are E bon kantaningaiko nako iai.

Ti te bai ae ko na ti karaolia, ko na kauka mataroan nanom, ni karina aabuen ana Tangira te Atua, ba e na kaoniko ao ni kai-riko nakon te kimareirei ae akea tokina."

E na manga reitaki



*"Ti kauka mataroan
nanom nakon Te Uea
ao kona kabaia"*





Ana Tangira Te Uea

E wetea arau lesu (makoro 3)

Ian Namakin. St Patre Pio, Suva

Mauri tariu ao Maneu n tabo nako ake kam mena iai n ana tangira te Uea!!

I rangi n teimatoa ni karabaia tariu ma mane u ake a teimatoa nanoia ni kakamarurungia ibukin kabutan te rongorongo ae raoiroi n ara bee ba ni kaongora ae Emmanuera ngkai e a manga otinako naba ae boou aio. E raba te Uea n ana tangira ma ana akoi rinanon tinara Nei Maria are bon ana tooa te tai aio are Te Riki n Imakurata.

Ti na uringa te karaki are karakinan natiu ae Barry are e a tia ni motirawa ma te rau, bon au moan nati are I tiba aron kananoangan maeuna inanoin aorakin buurona are e a tia ni bain tangiraia Te Uea iai ba E na ringa iai maiu ma au utu ao aio are I tibaia nakoimi ni moan otinakon Emmanuera, ao n aron are e a manga tibaia tinana ao kainabau are Maryanne n Emmanuera are nako. Eng, e rangi n teimatoa nanora ngaira ana karo Barry ni kan karokoa ana kamaeu te Uea rinanon natira aio rinanon ara tibatiba n tain ara rereitaki n tataro inanon ara botaki ae St Padre Pio iaon Suva ikai. Bon iai naba nanora ni kan ana reitanako te karaki ni kamaiu te Uea aio nakoia tarira ma manera ni kabane n tabo nako ake a kainnana naba ana kamaiu te Uea ae lesu Kristo.



*"Butia Te Uea ba Ena
anganiko te nano ae
marauruau ao butia ana
kamaeu"*

Nna manga tiba naba ngkai ana tangira te Uea nakoimi are E anganai inanon ara tai n nebonebo ni katituaraoi ba kanoan ara waaki n St Padre Pio ni karinea aia toa tarira ma manera ake a bon tia anganaki te tokanikai inanon te kimarerei i Karawa n te tabati are Aia Toa Kain Karawa. I rangin tauraoi ni koaua ba Nna neboa te Uea n te bong anne ao ibukin nanou ni katauraoai raoi ao la kaman namakina te kaokoro n au taratara ao I bubutia lesu ba E na na nanoangai ao ni kaota moa natiu nakoiu ba I rangi ni kan noria n aia Toa kain karawa n te ririki aio ba are e a bon koro teuana ana ririki ni kitaniai ao I a kan noria n arona ni kukurei

ma kain karawa n akea marakina irabatana n aron are i tataneiai iai n noria inanon ana tai ni maeu irarikira. Inanon te tutia n te ingabong anne ao e bon taonai te tang ae bat i ngke I a kaitibo ma Rabatan lesu ba I ataia ba anne te amarake are bon kanaia kain karawa ni katekeraoa aia bong anne. I kakaea Barry nakon lesu ma e bon aki te roko ni kaotia nakoiu n te ingabong anne. E bara te tutia ao I aki bara n nano ni bubutia lesu ba E na bon kaota natiu inanon te ngaina anne.

Boton te karaki

Imain warekan ae imuina ao I a bubutiko ngkoe ae ko tabe ni wareware ba ko na karekeia iroum te iango ae ko na bubutia lesu ba Ena nanoangaiko ao E na anganiko te nano ae maraurau ni butimaea ana kamaiu nakoim inanon warekan te karaki ae ae ko nang tauraoi n ongora.... E Raba te Uea!!!!



Inanon te bakantaii anne ao akea ba ti a bane n tauraoi ni kabane ma kain ara botaki ba ti na nebonebo ma are bon iai angin te bong anne ba are ai bon te reitaki ni koaua ma kain karawa n neboa aran lesu are E a tia ni katabwena aia Toa kain Karawa, ngkai boni Ngaia are E a tia ni mate ao ni maraki iaon ana kaibangaki ao E a tia n tokanikai ao n tekateka i angatain Tamana i Karawa. Te kamimi inanon te tai aio ba e tuai waki te nebonebo ma ngai I a kaman tang ao n uruaki kakaiaki n te aro ae I a bon namakina ana nanoanga te Uea nakoiu ibukin anganaku te maiu ae boou ao ai tera arou ba Nna kateimatoai iai ni koaua ba I aonga ni kona n roko Irouna neboa ma kain Karawa n aron ae ti karaoia iaon te aba. I main raoi te nebonebo ao I a tabeka te kuna are "E weteai lesu ba Nna Iria" ma imain anne ao Uriam e tuatua naba nakoia ara koraki ba e na bon weteaki lesu raoi ni kaomataki ni koaua ao E na kaoaki man te Umantabu are 2 te miniti raroana ma ana auti Uriam. Ai ngaia are e a bubutia ara koraki Uriam ba a na kamawa kawain lesu ngkana E roko imatan te mataroa lesu ba E na mananga

man te Ukari man te umantabu ao ni kawarira n te auti. I a tabeka te kuuna arei ma ai bon te kamimi nakon au namakin n au taratara ba l a noora te bai ae e a rangin riaon au kantaninga ba l a nora moa te ota ae e otanakoa mai matau ao imuina l a rinnako inanon te Uamantabu are e weteaki lesu mai iai. I bon nora lesu ni koaua are e a butimaeaki ni kaotinakoaki man te Ukari iroun ingoan ara botaki are St Padre Pio ao man tauaki baina ni karokoaki i tinanikun te Umantabu ao ni butimwaeaki iroun St Mikaere te Akaanera n tauraoi ni kairaki nakon te tabo are ti botaki iai. Ngke E otinako lesu man te Umantabu ao l a noria aomata aika ake a rangin bati maitia ni bwereina kawain lesu ma kunikaia te kamarai ae mainaina. I kona n ongo tangin te aoti (horse) ao tangin naba aia bare (belt) tautia ake a kaina ana baronga n tautia St Mikaere. Bon iai naba te boi ae kaokoro boina irou n te tai anne are kanga ai aron boin te roti e rangin boiarara. A bon rangi ni bati riki namakin l a mena inanona n te tai anne ma l kubanako ba inanon ana tai lesu



ni katauraoaki imain manangana ao e a kanakoa naba baina lesu nakoia te koraki aika a rangin bati ake a b'ai mainaina ao e a katika bain te teinimane are l a kaman tataro ni bubuti ba e na kaotia nakoiu n te bong anne are e a taua bain Barry ao man kateia i moana ba ngaia ae e na kairia nakon te tabo are ti nebobebo iai. Ngke E a roko lesu i matan te auti are ti nebobebo iai ma raona are Barry ao kanga l bon aki waekoa ni kiina natiu B are l a tia n rangin tataneiai n nonoria ni kainnano ngkua ma moana aika rawawatau ma ai bon te kamimi n te tai aio ao e a rangi n toka ribana ao ni botonim'ane ma ana kamarai ae mainaina n taua bain te Tia kamaiu nakon ara tabo nebobebo.

I nora natiu ni bon karokoa lesu i buakora n te tai anne ao l a bon rangi ni karabaraba n ana tangira te Uea nakoiu ngkai E a tia ni kaeka au bubuti ao man katauai ba Nna manga kona n noora matan natiu n te bong anne n aron are l a tia ni butia iai. E maunanko au taratara ao i a riki ba temanna te aomata ae i tatakarua neboa te Uea n te bong anne ma nanou ni koaua ma nanou ae eitiaki nakoina. Amen. E rangin raraba te Uea n ana tangira nakoir!!!!!!

Ana Tangira Te Uea Nakon Nei Ngaretin Ioram n rinanon te Botaki Charismatic.

E koreaki iroun Kaoti Teingoa, Te Ran ni Kamaeu Charismatic Group, Teaoraereke

Moan Rairakina man Te Kamatu nakon te Te Katorika n te ririki 2005, iaon Abaunamou Teaoraereke (Te Ran ni Kamaiu Kurubu)

Nei Ngaretin bon te Kamatu ni koaua ae natin Ioram Robati ma Nei Ereno Moniketi aika kain te kawa ae Buariki l Onotoa ao bon mitinare ana karo aikai n te Kamatu ngkua. E iein Nei Ngaretin ma Teikake Teakaea ae kain Makin ae bon te Katorika, ma ngke a mare ao a mareaki n te Kamatu iaan te babaire are a boraraoi iai aia karo.

Moan namakinan ana wewete Te Uea nakon Ngaretin ngke a taonna te aoraki ae te kabuehue ma te biua ao te aki mimim ao ai te maraki ngkua e nakotari inanon te maan ae uoua tabun (2) te namakaina, ao ngkua ena bain aoraki ao ea bon anganga buaka naba. N te taina ao e matu ngaia inanon ana auti ao e mi ba iai te aine ae e kawaria ao n titirakinna ba tera ae riki irouna, ao e kaeka ni kangai l wene ba l aoaraki. Aran te aine are e kawaria n te mi bon Nei Tewiti Tiim ae kain rarikina are e taku ba ena tuanga tinana ae Nei Tekiata ba e ata bain aorakiana. Ngke e ongo Nei Tekiata aorakin Nei Ngaretin ao e kanakoa te rongorongo nakoia Leaders aika Kaoti ao Tuana Tanuua ba e kainanoa Ana Tangira Te Uea Nei Ngaretin ao e raba ana Tangira Te Uea ba ea bon marurung n tain te kato-kabai.

Ngke e nora Ana Tangira Te Uea Nei Ngaretin nakoia ao ea motika naba nanona ba ena rin te Charismatic. E butimaeaki nanona anne irouia Leaders aika Tuana Tanuua ao Kaoti ao a wakinaka naba man te ingabong are imwina ba are te bon te moanibong. E wakinaki ana course Nei Ngaretin ma buuna ae Teikake n Te Maeu ae Onraken Te Maeu n irianaki ma te Boki are Irian Te Maeu ae Oranken, a raonaki Leaders aikai irouia Nei Rota Taraia ao Nei Kaia Tekewa ni karokoa are a kainaomata-aki iai. N te kooti ao e noraki aroia ba e ririkirake irouia te maeu n tataro ao riki te kan neneboa mani kamoamoa Ana tangira Te Uea inanon wakinan aia kooti ao ea manga bubuti Ngaretin ba ea kan mare n te katorika. A buokia Leaders ao a kaongoa te catechist ana kainano ao e raba Te Uea ba



“Moan namakinan ana wewete Te Uea nakon Ngaretin ngke a taonna te aoraki ae te kabuehue ma te biua ao te aki mimim ...”



"Aio ngkanne ana rongorongo Nei Ngaretin iaon buokaia kain te Burikatorio"

ea waki naba aia reirei ma te catechist ibukin te Babetito, te Mare, te Benetenia ao ai te Kombirimatio. E koro rimoa aia wiki are nimaua n aia course ma e tuatua te catechist ae Bukitaake Tongaua are bon ngaia naba n te tai anne te Chaplain n te Charismatic ba a kainaomataki imwin are a tia n anganaki taian Takarementu. A bon reitanakio aia kooti ni karokoa te kaonobong are 10th Okitoba 2005 are a mareaki iai ao imwin te mare ao ea taonaki nako naba te kainaomata. Imwin anne ao e nene mani waka inanon te Onimaki Ngaretin ao e riki ba temanna naba ngaia te tia katoamaua kabutan te rongorongo ae raoiroi nakoia aoraki, bure, baaba ao taabo nako ake a kainanoa ana tangira Te Uea, ao te bai ae kamimi ba e rangin maiti karea ake e kaotinakoi inanon tain te tataro riki ma taian aoraki ao aikai karea ake ti kokoauai ba a tia n reke irouna;

- i. Te Taetae n Ataibai, ii. Te Taetae ni Burabeti, iii. Te Matairiki, iv. Buokaia kain te Burikatorio.

Aio ngkanne ana rongorongo Nei Ngaretin iaon buokaia kain te Burikatorio; "N te kanimabong teuana ao I tataro imatan te Eukari tao n te aoa tebwina (10) n te tairiki. I bon Rotario ao i tekateka n teitera are aia tabo maane ni uakan ma te winto. Inanon au Rotario are I tataroakina ao I mimi iroun temanna te ataeinimane are ea kaoti naba itinanikun te umantabu n te window are e mena i angataiu. E wetea arau ao ngai I tou ao ngaia e bubutiai ba I kona ni buokia ? ao I titirakina ba e mananga ma iaa ? Ao e kaeka "I mananga mai mainiku' ao I kaeka nakoia 'Tera am bubuti ?' E kangai nako. 'Kona nako ni kawara tinau ae Nei Bwebwre ao kona tuanga ba ena ana te tataro ni katoa bong ae 'Te Tama ae akea tokim' ao I a titirakinna ni kangai' Ao antai aram ? E kaekai 'arau bon Maiawa' Ao na kanga ni kawara te aine anne ae i aki kiniaa ao i aki ataia ba e memena ia? ao e kangai nako 'Ngkana ko ukeuke ao e na reke'

N te Katenibong are i muina ao ti kurubu n ana auti Nei Teniiti i Abaunamou ao I a tiba ngkanne au maroro ma Maiawa. Tabeman ibuokaia kain ara boraki a kiniaa Nei Bwebwre ao ataia ae e maeka iroun Nei Tebamari i Bariki. A kaunga nanou kain te botaki ba N na riai ni karokoa kanoan te kabeabea arei ba e aonga ni koro naba bukin te kamaeu nakon Maiawa. N te bong i muina ae te Kaabong ao I a nako ma raou teniman aine ake a raonai ba Nei Teretia Teangabure, Nei Buaua Moaniki ao ai Nei Marina Tiin. N rokora iroun Nei Bwebwre ao I a bon kaongoa bai ni kabane ake e taekin natina ae Maiawa nako. E aki kakoaua te rongorongo i aan te koaua are e a tia ni mate natina ae Maiawa ba e kurati (car accident) n te kaa. Ma I a bon karaua n rarangai bai ni kabane n aron are e taekini natina ae Maiawa n ana tai ni kaoti nako. E a kakoaua te rongorongo ao ea taonna te tang ae korakora ao i muina e titirakina ba aekakira Maiawa. I a bon kababarara aron Maiawa n norakina ao n anuana are e kaoti iai nako, ao e a manga ana te tamnei teuana n te

frame ao e kaotia nako. I a kangai nakoina ba boni ngaia raoi te teinimane anne n te tamnei are e kaoti nako. E karabai ao e a titiraki ngkanne ba tera ngkoia ana rongorongo? I tuangnga ba iai te tataro n te Pieta ae "Te Tama ae Akea Tokim" n te iteraniba 47 ae e na tataroakina ni katoa bong ibukin buokaia kain te Burikatorio. Ibukina ba akea ana Pieta Nei Bwebwre, ngaia are I a kutuka au boki irouna ni karokoa ngkai.

N te taina, ti tataro ma ara aoraki ae iai ana makuri teuare buakaka irouna. Boni ngai (Kaoti)ae I kaira te katokabai. I nanon te tataro ao a kounako riaborona ake aman ao temanna are e tiku irouna ba e karaba te aoraki. E ti kaoti ake aman ao e karaba are temanna, ma Nei Ngaretin n tain te katokabai, e a noriia riaboro ake aman ba a nako ni bae i aan ana kaibangaki lesu. E a manga nora riki temanna ae e a bon inaomata ni kamoamoaa ni koatia ba e aki ataki.

Ngke e nora te riaboro aei ae te aine ao e a roko naba ma arana ae Nei Ngarennao. Ngaia are e a bon butia naba St. Mikaere ba e na anaa Nei Ngarennao ao ni kabaea i aan ana kaibangaki lesu. Ngke e tia ni butia man ni wetea St. Mikaere ao e a bon kaoti naba St. Mikaere n taua te riaboro arei ao e noria ni kabea i aan ana kaibangaki lesu. E noriia ba a uatao ba ai ngaia niman ni bae i aan ana kaibangaki lesu. N te tai naba arei ao e a bon kea naba te aoraki ni karaba Te Uea ba a bane ni kounako mai irouna taian riaboro akekei ao e a bon rau naba ba ai bon te aomata ni koaua.

N te taina ao ti reitakki ma tangaia tarira ma manera ae Uriam ma buna ae Nei Atuna i Abaunamou ni moan te ririki 2009. N tain ara nebonebo are e kairia Uriam ao e kanakoa te taetae ni burabeti n te ianena iroun manera ae Nei Turiana. Inanon te ianena aio ao e otinako kabarana aika uoua ba aikai;

- i. Tina kakaonimaki n taian karea are e mwio-kira iai Te Uea – Nei Turiana Tekeua
- ii. A maiti tibangami ae (1,000,000) te mirion maitina ao makuria ma te korakora – Nei Ngaretin loram.

Ti neboa te Atua ae Maeu n ana we-wete nakon manera ae Nei Ngaretin are e a tia ni weteia man ana onimaki ni Kamatu nakon ana Ekaretia ni koaua ae te Katorika. Ara tataro ma ara bubuti nakon Te Uea ba e bia kateimatoai karea ake e a tia n angan Nei Ngaretin n reitaki naba ma tarira ao manera ni kabane i nanon ara botaki ni Charismatic i aonnaba ni kabuta, ba a bia kamanenai raoi ma te kakaonimaki, te nanoanga ao te nano-rinano ibukin kakoroan ana kamaeu Te Uea nakoia ana botannaomata, ba e aonga n ne-boaki mani kamoamoaki iai.



*"I bon tiaoki ao e a toki
au korona ao mani
karekea taraan te
tamnei ke te katiibū
anne, ma angin te
maaku are e taonai"*

Nei Maria ae te Imakurata bon Tinara ae Te tia buokira

Nei Nangiuia Ioane (ae te Kamatu)

Kam na mauri ngkamii taani wareware inanon te beeба ni kaongora ae te Emmanuera inanon ana Tangira ara Uea ae lesu Kristo



Bon te kaitau moa ae batinakon te botaki ae te Karmatic ngkai e kona naba n anganira ara tai ngaira ake ti a tia n nori aron taiani kakai nakoi; ba ti na tibaia naba nakoi tarira ao manera inanon te 'Emanuera'.

E koaua ba bon temanna naba ngai are I a tia naba ni boo ma ana kakai Nei Maria. Aio e bon riki nakou inanon te ririki 2008.

Bon te namakaina ae Aokati n te ririki anne are bon ana namakaina Nei Maria. I a mananga ba Nna karaoa au korona n te Umantabu ae 'Santo Bauro 2' i Takoronga i Betio. Ai bon tiba au moan tai naba ni karaoa au tataro n te Umantabu n te tai anne iaan are a bon tuai raoi n rangi ni mate ni kuna taian tataro irou. Bon ti teuana ae I rabakau ba te korona.

I a mananga n te tai anne ni karaoa au korona n te Umantabu ni bubuti naba te bai ae rangi ni kainnanoia nanou boni ibukin arora iaani mwengara. Ao n aron ongongou irouia tabeman nakoi ba te kabanea ni mwaka roiroi bon ti te korona.

I a moana au korona raoi n te 9 raoi bongin namakaina ae Aokati n te moaningabong. Ibukina ngke I tuai raoi n rangi n rabakau naba te 'novena'. I a moti n nanoia inanou ba N nang bon tataro n te Umantabu ni kabongana te korona ma motin nanou ae Nna keiakina au bui ae teuana tengaa n teuana te bong inanon ruaia te bong.

I kona ni mananga n te moaningabong ao I okira mwengau n te bwakantai. Au katautau iai ba I kona ni keiakina 6 nakon 8 te aoa n te Umantabu bon ti ibukin kainnou are I bon rangi ni kainnano iai.

I a waaki inanon anne ni keiakina au bwi are tenga inanon teuana te bong. Au tabo are I mena iai ngkana I karaoa au korona ibukin te mataroa n te umantabu are kaitara Takoronga, ao I a tekateka ibukin mataroan te Umantabu anne kanga ni kaniai

ma window ake ibukina.

Bon au ka onoua ni bong te tai anne are I tokatina nabi ari i boni mena naba n au tabo anne. Ai mwin tawanou nabi te tai anne, e a roko nabi iro are Nna nako ni mena raoi i matan te tamnei are tamnei Nei Maria. I a karaurau n teirake ao man tekateka imatana ni karaoa au bwi are iaoni kawaina ni bane. Ngkanne iaoni kawaina ni bane au kaonobubua ao I a tokara ngkanne 800, ti tebo ngkanne ma aua te raaun, e bane onobubua ke tenua te raaun ao I a roko n au kaaua n raaun. I a roko iaon te katenua ni miterio 'miterion te maraki'.

I a katorobubua ngkanne ni kaitara raoi matana ao man reita nako au korona. I a boni korona imatana ni kabanea au bubuti ma au onnon ae mangori nakoina ba e na boni buokai ni kainnou are I a boni mananga iai, ao I a waaki iaon au miterio ni maraki. I a waaki ni korona ao mani kaitara raoi matana are n te katibu anne. I aki rangi ni katabea au iango iai ba tao e bure au taratara, I a manga bon taraia riki ao boni moan te kuba nako ngai ba a manga matu matana, I taku i boni irou, kai e bon taratara matana ngke I noria, e aera ngkai e a manga matu. Bon te kubanako ngai n te bai are I noria arei, I a manga bon taraia raoi riki ni boni kakoaia ao bon te kubanako ngai ba e a kaitarai matana ni karuberubei. Bon iai te namakin ae korakora iro are e roko iro n te tai anne. E a roko iro te maroa inanon te Umantabu. Bon akeia kain te Umantabu n te tai anne ba bon ti ngai.

I bon tiaoki ao e a toki au korona ao mani karekea taraan te tamnei ke te katiibū anne, ma angin te maaku are e taonai. I bon rang ni maan ni katorobubua n aron anne ao man aki ataa te bai ae Nnang karaoia. I a mananga tokin are I a roko iai. E toki angin te bai arei iro are I a manga boni waaki iaon au miterio ni maraki. Ngke e boni bane raoi au bwi are I motin nanoia ibukin te bong anne, I a manga bon tekateka iaan tamnei Nei Maria anne ni iangoa aron ana kakai ma ana makuri nakoi ba tao e a bon aki kukurei iro. I bon tia raoi n te Umantabu n tabeu are I karaoia ao I a kitana te umantabu. Ngke I roko ni mwengau ao e a kaoti naba kainnabau. I a karakina te kakai are e kaoti nakoi, ao I taku moa nakoina. Nnao e boni kona ni karuberubei matana te kaitibū? E a manga taku tera ae ko nanonna. Te bai ae I noria n te umantabu n tamnei Nei Maria are te kaitibū, ba e a manga ruberubei matana e a manga matu matana. E kona nabi n riki

anne?. I a manga boni kangai nakon kainnabau, tao e buakaka e a bon aki kukurei irou. Tao a rangi ni maiti au bure. I a bon titirakina naba kainnabau n aron anne iaan taben nanou n noran te kakai are I noria anne. E kaekai kainnabau ao e taku. I aki kona n ataa nanon anne. N aron te kaoti anne nakoim e boni kaotia nakoim ba e boni maiu. E a manga tuangai, E uara ko ata raoi ngkanne Nei Maria ae tiaki te kaatibu ao ane e a boni kaotia raoi nakoim n tamneina anne. Ao ngai I taku nakoina, Eng. ngaia I a bon tiba nora te aekaki ni kakai aei.

Te Ka-uoua ni kakai



I a tokara ngkanne au kawanua ni bong ao I a manga mananga naba ba nna karoa ta-

beu ibukin te bong anne. Ngke I a mananga ao I uoti au Uee rooti aika teniu. Ao I a katokai raoi imatana. Teuana nako Takoronga, ao teuana i nuka ao teuana nako Temakin. Ao I a manga tiku naba imatana ni karoa au korona. Te moanibong naba te bong anne, ao I a moana au korona. Ngke I a tiba moana au waaki n te ingabong anne ao ti tebo ma e a boni katikaki naba matau ba Nna tarai au uee ngke I menai imatan tamnein Nei Maria anne. Bon te kuba nako ngai ba te uee te rooti are i nuka ba e a mwaing naba ao bon titebo ma ae iai ae e boni kamwainga, ao e a boni mwemwe naba irouna man toka iaon te uee te rooti are nako Takoronga ke iangamaingin Nei Maria. I taratara nako ao bon akea naba kain te umantabu n te tai anne, ba bon ti ngai naba.

I a manga tararake naba ao ni manga tara te tamnei ao I taku, e uara ae I a bon tiba moana au tataro ao e nangi manga karoai naba ana kakai aika a kamimi nakoii. Bon te bai teuana iaou are e a bon roko irou ba te maroa ae korakora ao I a aki korona ao I a boni karoai n tekateka ao e a roko irou are N nang aki karoa au tataro ba N nang kitana nanon te umantabu ba e a roko ae I a maku, tao ibukin are ai bon tiba au moan tai ni karoa au tataro n te Umantabu ao I a manga boo ma ana kakai aikai aika rangi ni kamimi. Tao bon aio ana Tangira Nei Maria nakoii ao e aera ngke I a manga makua. Ngaia are e bon nora nanou ae I maroa ngaia are e a katoka ana makuri. I a waakina au korona n te tai anne ni karo-

ko are e a koro au bwi are I motin nanoia. Tao boni iai riki ana kakai ae tao e na karaoi n te tai anne nakoii ma e na kanga e a totokoai angin te maaku. I a waaki ngkanne n au kabanea ni bong, te karuaiua ni bong.

I a roko iaon au kabanea ni bong ao I a waaki inanona ni karokoa are e boni bane raoi au bwi are I waaki inanona. Ngkanne I a bon tiku inanon mwin au bong akanne ni bon ana te namakaina anne are Aokati. E aki bane bongin Aokati ao e a bon kaekaki raoi au bubuti are I a tia ni bubutia Nei Maria are I bon rangi ni kainnanoia ti inanon mwengara ao riki ibukia natiu. I bubutia Nei Maria ibukin kainnabau ngkai e a maan n aki makuri. Ao I kabanea au bubuti nakoina ba e na buoka kainnabau ni kareka ana makuri. E aoki kainnabau n te tai anne boni mwiin are e bane raoi au tataro. Tao iraua te bong imwiin anne ao e a kaongoai are e a reke ana makuri. I a boni kangai naba, E raba Nei Maria e a kairai ngkanne ba nna iria nakon ana tabo are makuri iai. Titoan te Bobotin Akawa are e kaitara ma St Mikaere imain ae nako te tabo anne ke n okira te tia baibai, ma e bainna ngkoa te Bobotin Akawa. Ngke ti a roko iaon te Umantabu are Santo Bauro, I a tuangnga kainnabau ba e na rimoau ba Nna nakon te Umantabu ni karaba moa Nei Maria n ana ibuobuoki ae rangi ni korakora nakoira. I a rinnako n te Umantabu ao I a nako ni katorobubua imatana boni moan te kuba nako ngke I a roko imatana e aki butimaeai tamneina are e takini baina ma rabuhan atuna are iaona. E a bon butimaeai aekakin tamneina teuana, bon te Kaatibu naba tamneina are e kaotia arei, kanoani matana a kiriin. Iai ana bau nuea iaona ae rangin raneanea ao iran atuna e maoto ke ngeri ma te Kaatibu iran atuna anne. Inanoni baina ngkanne boni iai te bai ae taua ba ti tebo ma taraana irou kanga te oko ae te biti naba rabatana.

I a boni karekea taraan tamneina ao I a bobaraki nakoina n anganna au karabaraba. Bon te bai ae riki irou n te tai anne ai bon akea te maaku.

Te kabanea ni kakai ae riaon te kamimi

E bon rangin n rootai te kukurei n te tai anne ngkai I ataia ba e a tia ni butimaea au bubuti are I bubutia iai, ao e a boni kaeka naba inanon te tai ae waekoa. I tiku ni moan irarikina ni bon taraia ma tamneina are e boni kaotia naba anne.

Ibukin ienikuriu ibukin buokan kain-



.....

*"E bon rangin n rootai
te kukurei n te tai anne
ngkai I ataia ba e a tia
ni butimaea au bubuti
are I bubutia iai"*



*"Ngke I a bon tabe n
aneneia ma te tang ae
taonai ba angin te
kukurei ao miiakinan
te tai anne"*

nabau are e tuangai ba Nna kawaekoai iai ao I a otinako n akea au kantanninga iaon te tamnei arei. Ibukin babau ma maninga nakou ngke e a reke ana makuri kainnabau, ao I a boni maninga nako naba iai mani kukurei.

Ngke I otinako ao e a tiba roko uringakin te tamnei arei irou. I a manga bon tan rikaaki n tarala ao e a okira are bon tamneina mai mwaina. Ao I taku ibon irou. Ai barbara ngai ba tera ae N nang katawe iai. I boni baebaeti inanou, ao e na kangara ao are I a oimwi ba e aokira arona are bon tamneina mai maina.

I karaua ni iangoa ana kaotioti are kaotia nakou ao I taku ibon irou ke tao I tiku riki ni maan irarikina ao tao iai riki te bai ae na karaoi nakou. I a manga iangoa te baere e taua i baina ba e a kangara n reke arei. E reke ba au rongorongo nakoia kain au auti te baere I noria arei ao bon nakoia naba raou n aine ake I kinaia. A manga taku nakou. E aera ko aki butimaea te bai are ibaina?. E aki reke raoiu au iango n anne ba e a maninga nako naba au iango ngke e a reke ana makuri raou arei.

Tao e koaua tao boni iai nanoni kaotioti akanne, ma ibukina are bon akea naba ootau raoi iai. I aki ataia ae ngaia bon ana Tangira Nei Maria are e moani kaoti nakou ao e aera ngke I taku ba e aki kukurei irou ao e aera ngke I a manga makui ana kakai nakou. Iaan raoi ae a bon tiba reke raoi otau iaon ana kakai Nei Maria, ngaia bon ana Tangira nakon te aomata are e kaotia nakoina. Ai kabaiara ngai n ana Tangira Nei Maria nakou ma e aki manena raoi aron ana Tangira nakou ba I bon rangi ni biritinaniku au kantanninga iai.

I a bon tiba kakoaua raoi ba te korona ngaia bon te kabanea ni makaraoiroi ibuakon taian tataro imuin te tutia. I kakoaua Nei Maria ae tiaki te Kaatibu ma ngaia e boni maiu. Ao I ataia ba bon temanna naba ngai ae I bon rangi n ririba Nei Maria ibukina are aongkoa te Kaatibu. N te tai aei ao I ataia ba e bon rangi n tauraoi ni butimaei kainnanom ni kabane ake ko kainnanoi.. Kam raba



E roko Iesu...Ningai te Uea ae Nna katonga iai Kororaoin te Kukurei

Uriam Timiti. St Padre Pio, Suva



I karaba te Uea ngkai e teimotoa ana Tangira ae moan te kororaoi nakoira n taai nako are ngaia are ti kona iai ni kangai, Mauri n Ana tangira te Uea. Bon au kantanninga ba e a tia n reke iroumi te anene are I kanakoa imain aia Toa Kain Karawa ao e a bon tia naba n reke ami tai n tataroakinna ao n rinnako raoi inanon taian manewe ma Nanon te Uea are E anganiira inanon te anene aio. Ni moan rekena irou ao bon akea au moan iango ba bon ti ngkami tariu ma maneu are I kan tibaia ma ngkami. N aron tein te rongorongo ao I taku ba e kaeineti nakoia raora nako ai ngaia are I a iangoia ba tao N na bon riai n tibaia ma tarira ao manemi ni kabane. E ngae n anne ao e bon tabeaianga nanou ba Nna riai ma ni matoroakinna ma ngkami ba tera tibangara iai.

E oteaki te kuna aio n te Kaonobong 24 October, 2009, tao 2 pm n au aobiti. Inanon are I tabe n iangoa karaoakin au bai n reirei ao akea ba e a bon roko naba te kan anene irou ao e roko te ee teuana are I taku ba te korati ke taitan kibu ma eena ae e na okioki.

Ngke I a bon tabe n aneneia ma te tang ae taonai ba angin te kukurei ao miiakinan te tai anne. Inanon te weekend anne ao ai bon te kamimi ba e a bon tiku irou kan anenean te kuna aio ni karokoa ngkai.

N te moan tai ao kanga bon iai te maku teutana irou n aron taekana ma oin te kantanninga iai ao I a bon tataroakinna ba e kanga; N na katia ke Nna aki. E bon roko te nano ae korakora are N na riai ni katia ba bon rabatan te rongorongo ae moan te kakawaki nakoira ni kabane ngkai boni ngaia raoi oin ara onimaki ni charismatic ao ni kiristian. Bon au tataro ba ti na bane n anganaki te ingainga n nano ao te tauraoi nakon te tai are ti na katonga iai kororaoin te kukurei ma te Uea i Karawa. Ti karaba te Uea ba E a bon tia n anganira raoi reitan ara kibu ni koora are 'katongan karawa ikai i aonteba'.



Ibukin nanou ni kan ataia ba tera nanon te kuna aio ao I a bon manga karaua riki n tarai taian wareboki n te Kaonobong ae 24 October ao e katikaki matau nakon te taramo n te bong anne are kangai "Te Uea aikai te koraki aika a kan noora matam" ao kanoan te moan wareboki are kaotia ba bon Tamnein lesu ae Ngaia ae E na anganira kororaoin te maiu. Bon iai naba te tataro nakon St Anthony are ana toa te Kaonoboong anne are e rangi ni kateke nano are bon te bubuti ana buoka St Anthony ba ti na kainaomataaki ibukin kabutan te rongorongo ae raoiroi ibukin karokoia aomata ni bane nakon Abanuean te Atua. Aio are ti bon ataia ba bon reitan nanon tinara Nei Maria ni kan karokoia aomata nako irarikin Natina ae lesu ba a aonga n recke irovia te Maiu ae akea tokina. E oti naba man te ewangkerio n te Kaonobong ba bon iai noran unin te Atua ibukin te bure are boni ngaia ae kabotauaki ma te aroka ae aki kariki ua are e na riai ni koreaki. Ti riai n reita nanon te tia ununiki are butia te Atua ba e na anga riki te tai teutana ba e na ribana riki te aroka ba e aonga ni kariki ua ao man aki koreaki. I taku ba bon aio nanon Nei Maria ibukia natina ba e rawawata nanona ngkana e nang koreaki te aroka ae aki kariki ua ba muina ao e na mate.



Te kateniua ni kamimi are I noria n te kuna aio ba inanon te Tabati are aia toa kain Karawa (teuana te wiki imuina) ao I a kunea ba te taramo n te bong aio bon titebo raoi ma te taramo n te Kaonobong are e recke iai te kuna are kangai taekana, "Te Uea aikai te koraki aika kan noora matam". Man aio ao I ataia ba aio te kuna are e atia ni katauraoia te Uea ibukin aia Toa Kain Karawa.

N te tai aio ao I a bon kakoaua raoi ba aio bon ana rongorongo te Uea ae tangiria ba ti na uotia nakoia tarira ma manera ni kabane ao Ngai i bon irou I a tia ni motikia ba Nna kabanea korakorau ni kabuta te rongorongo aio n ana buoka tinau Nei Maria are bon ana toa te bong aio ngke E a tia n anganna te Atua te riki inanon te itiaki ke te Imakurata.

I a bon reitai ma ngkami ngkanne n reita nanon tinara Nei maria n ana toa aio n tataroakina te anene aio n taekana aika a oti inano.

Ningai te Uea ae Nna katonga iai Kororaoin te Kukurei



1. *E roko lesu ba E na kawarai, Ba E na kairai nakon te Tama E kan anganira Onraken te Maiu, Iroun Tamneina ae Raoiroi*

*Chorus: Ningai te Uea Nna katongai iai Kororaoin te Kukurei
Kairai te Uea ba Nna noriko Inanon te mimitong*

2. *Nora kororaoin Ana Tangira, lesu E tine, E maraki ibukiu
E uoti rawawatan au bure, I aon ana Kibangaki*

3. *Ongo banana ngkai E weteiko, E tatinga, E tei n te mataroa
Kauka nanom butimaea, Ana Tangira lesu*

4. *Bon iai au tabo ni maeka, lesu E katauraoia ibukiu
Bon te mwenga n raoi ao ni kabaia, Ngkai ao n aki toki*

5. *Nna bon nebobe ma anera, Ao Nei Maria ma kaini Karawa
Ti na neboa te Atua, Inanon te mimitong*



"Bon iai naba te tataro nakon St Anthony are ana toa te Kaonoboong anne are e rangi ni kateke nano are bon te bubuti ana buoka St Anthony ba ti na kainaomataaki"



Te Maeu ae Tabu

Berebitero ibukiia antai ao tera ara iango ibukin nakoia ae e Tabu?

Nei Beneteta, St Padre Pio Suva

Kam na mauri tariu ao maneu n Ana Tangira te Uea.

I kakaea moanakin au kanoa aio ao e roko iangoakin Santo Josemaria Escriva te Tama naba ngaia temanna ni maeuna ao ngaia naba are e katea te botaki ae Opus Dei are e tara buokan maeura ngaira taan kan iriira lesu ni koaua rinanon te maeu ae e tabu inanon te bong teuana ma teuana. N ana tangira te Santo alo ni ikotaki ma ana tangira ara patron n ara botaki ae Santo Padre Pio ao ti a reitiira ma ngaia n tatato na kon lesu ba E bia buokia ara Berebitero ni kabane inanon karaoan muiokoia are E a tia n katabuaki nako iai.

N ara tai ni kauringa ana ka 37 n ririki n Tama ara Berebitero ae e karineaki iroura ae te Tama Ikataere n te bong ae 30 n Tebetemba 2009 ni mwengan Uriam Timiti i Nabua Suva i Biti ao e a kaongoraira te Tama aron ana moan ririki ni makuri i abana i Makin. I uringa ana karaki are e karakina iai aron nanona ni kakaea aron kakukureiaia kaain ana baeriti. E taku te Tama ba e katoa tairiki ni kaea mwengaia kain te kaawa are e mena iai ba e taku ba ngkana e ira aron maeua n reitaki ma ngaiia n aia takakaro ma te baa ni kaati ao a na bon kukurei iai. Ngkana e okira mwengana ao e a bon babakanako te tai. N ana karaki te Tama ao e taekina te tai aei ba are a tangirua mooa iai. Ti bane n ata te tai anne ba e a bon kaan te ngaina iai.

Akea ba n te bong teuana ao e a roko irouna temanna kaain ana baeriti ao man tuanga man taku 'Te Tama e a bon aki tau ao man tararaoi aron okiokim nakon mwengam ae te kiriangaina'. E taku te Tama ba ngkekei naba ao e a riki naba aio ba ai te kauring ao te reirei nakoina. Mai ikanne ao e a bon katoka naba kaean te takakaro ma te baa ni kaati.

E a reke i nanou ba N na karekea aia iango raora tabeman ibukiia ara Berebitero ba tera raoi aia kaantaninga ibukiia aia Berebitero n aron ae e kaotia temanna kaain ana baeriti te Tama Ikataere. E taku naba ba ni karekean aia iango iaon aei ao e a bon buokiia naba ara Berebitero riki inanon aia riki ae 2009 are bon te ririki ae e kateaki iroun Tamara te Pope ba Aia Ririki Berebitero.

*"Ao ngkoe tera raoi ae
ko tangiria ba a na
kakaraoia Berebitero?"*

Aikai tabeua kaantaninga ibukia ara Berebitero ake a reke inanon au maroro ma aomata tabeman ake bon kaain ara aro. Iai onoman kaain te aba ae Fiji (uoman mane ao aman aine). Naakai bon kaain baeriti aika teniu ake I kinaia inanon irirakin Tutia n tabo aika Nabua, Cathedral Suva ao ai bon au baeriti ae St Joseph the Worker i Tamavua ao iai naba tengaun kaain Kiribati (niman mane ao niman aine) ake a maeka ikai ibukin te reirei ao ake a bon maeka naba ikai ibukin te makuri ao tabeman ake a bon kaaina ikai imuini maingjia mai Kiribati.

I uringa te Tama Ikataere n au ribooti aio ba bon ngaia ae e kaunga au kakae aei man taku ba te ribooti n aron aei e na bon riki ba kaungaan riki nanona ni kan kekeiaki n nakoana ngkana e ataia ba tera raoi aia kaantaninga aomata ibukiia aia Berebitero. E atongnga naba te Tama Ikataere ba n atakin nanoia aomata ake a makuri ma ngaiia ao ibukiia ao e na bon karokoraoa riki aron karaoan nakoana are e a tia ni katabuaki ibukina.

Au tatato ba e na aki taraaki te riboti aio ba kabuakakaia ara Berebitero ma e na bon riki ba kaungaan nanoia ibukin aia kekeiaki ni iriira nanon te Uea ae lesu are Ngaia ae a Onea Muina ikai i aon te aba.

Au titiraki are I kawenea nakoia koraki aika tengaun ma onoman aikai bon ti aei are I taku ba e na kaunga aron moanakin te maroro. E kangai- "Ao ngkoe tera raoi ae ko tangiria ba a na kakaraoia Berebitero?". Aikai aia kaeka ake I taui ba kanoan te maroro-ribooti aio:

Oneaia

Ti tangiria ba a na kaokoro oneaia; e na tara raoi riki ae a babaina te long pants.

Enga aia mama a aki bae ni babainna?

Aki tararaoi ngkana iai buaia.

Ngkana a kauniia n te ngake e aera a aki katuka aia kau i tinaniku? Riki e aki tararaoi ae a baina te kau aei n aia tai iaon te bao ni karea.

Anuan Maeua

Ti tangiria taama aika a aki unun ba a bon kakamaku kawaraia.

E raoiroi ngkana a tauraoi ni butimaia aomata n taainako n tabetai ko roko ni karebwerebwe n aia auti ao ti tungaki ba e matu ke e amarake. Tera ngke iai i tinanikun aia auti aia tai ae e na kaota aia tai ni kan kawaraki.

N te Tabati imain te Tutia ao e raoiroi ngkana iai te aoa ni benetenia ba n

tabetai ti kaean te Tutia irouia tabeman te bong ae te Tabati.

Buokala

Kanga a na riai n aki makuri aine irouia ara Berebitero ti ngkana bon aia koraki.

A na aki riai ni kaungaki aine ma Berebitero n airiiri.

Te mooi yagona ni karokoa bakanakon te tai e a bon aki tau ibukia ara Berebitero.

Ti bon aki kukurei n noria ara Berebitero n taabo ni moi manging.

E na kamaingaki n te tai ae waekoa te Berebitero ae e ataki ba e reke n te kanganga riki ma tangiran te kan rekereke ma te aine n te aro ba e na waekoa n uruaki te aro n reitaki aio ao a na buokaki iai.

Aikai aika a otinako inanon au marorokakae aio ao e bia kauki nanoia ara Berebitero te Uea ni warekan nanobubuia kaain aia baeriti aikai.

Au bubuti ba kam na raonai n tataro ibukiia ara Berebitero n te tataro are I rairia ma Uriam are e bon otoia Santa Teretia n Iesu te Tei ibukia Berebitero. Bon te kamimi ba bon aio naba te tataro aio are a bon atotonga kaain baeriti aika teniuia- Cathedral Suva, Nabua ao Tamavua ni katoa aia Tutia ibukin Aia Ririki Taama, Tuun 2009 nakon

Tuun 2010.

Te Tataro ibukiia Ara Berebitero

Kabarabara:

Te tataro aio boni ngaia are a karinaki n ana moan tai n otinako Emmanuera Vol, Issue 1 are e oteaki iroun St Teretia n Iesu te Tei.

Iesu, Ngkoe ae bon te Berebitero n aki toki,

Kawakinia am Berebitero ni kabane inanon Atinibanim ae moan te tabu ba a na katanaki iai man taian kabuanibai.

Kateimatoa itiakin baia ake a aki toki n taua Rabatam ae Moan te Tabu

Ao kawakina itiakin wiia ake a aki toki ni katonga Raraam ae Moan te Tabu.

Kaitiaka ao karaneanea nanoia ake Ko a tia ni katabui ibukin nakoia ni Berebitero.

Ao rabunia mani katania n Am Tangira ae Moan te Tabu man taian kariirii nako ao baikorakin te maiu aio i aonteaba.

Kakabai ai ni kabatiai uaan aia beku Ibukim ao ke e riki kamaeuan tamneia aomata ba maten nanoia ao kakukureiaia iaon te aba,

Ao kawaia ni karekea te kanuanga ae te kona ni maeka ma Ngkoe inanon te mimitong ae akea tokina i Karawa. Amen.



Katabuan Fr Saimon Kokoria, Santa Maria Bikenebeu Parish, n te kaonobong ae nako 5th December 2009

Ko raba Te Atua ibukia ara Tama aika boou ao aika ana manga katabuaki inanon te ririki aei.

Ana katekeraoi Emmanuera ma kain te Kiribati Catholic Charismatic Renewal Service (KCCRS) nakoia ara Berebitero n te utu ae te MSC aika: Fr Saimon Kokoria, Fr. Uaati Kaewaua are e katabuaki n 28th November 2009 ao ai nakoia naake a na katabuaki n 12th December 2009 aika Riikan Tetoaiti Tokanikai, e na katabuaki i Kiribati ao Riikan Ikenasio Takasi are e na katabuaki i Futuna n te FSM.

“Tia tataro ibukia ara Tama, Tiina, Taari ao ara taan kairiri I nanon te Ekaretia”